

四庫全書

史部

欽定四庫全書

史部

唐大詔令集卷三十二至五

詳校官編修臣范來宗

編修臣裴謙覆勘

總校官編修臣倉聖脉

校對官學正臣常循

膳錄監生臣甯汝欄

欽定四庫全書

唐大詔令集卷三十二

宋 宋敏求 編

皇太子

追贈

邵王贈皇太子制

申王贈惠莊太子制

岐王贈惠文太子制

慶王贈靖德太子制

興王贈恭懿太子制

齊王贈懷懿太子制

晉王贈悼懷太子制

冊贈

節愍太子謚冊文

惠莊太子冊文

惠文太子冊文

恭懿太子冊文

哀冊文

懿德太子哀冊文

節愍太子哀冊文

惠莊太子哀冊文

惠文太子哀冊文

惠宣太子哀冊文

恭懿太子哀冊文

昭靖太子哀冊文

莊恪太子哀冊文

罷祭

停官祭贈太子勅

追贈

邵王贈皇太子制

門下悼往興哀事極於理義飾終追遠禮著於經國故
邵王重潤漸履雲霄分輝日月體謙恭之質蘊忠順之

誠愛敬盡於宮闈仁孝聞於區寓地居長嫡允膺崇樹
天不憖留奄隨運往朕丕膺寶命迺眷承祧瞰朱邸而
無從縗青方而結款宜加贈典正位元儲可贈皇太子
所司備禮改葬主者施行

神龍元年
二月九日

申王贈惠莊太子制

德盛者必享休名道高者必膺殊典況人倫之重義切
因心天屬之深情殷追遠故司徒申王撫馭哲聰明本
乎天性溫恭孝友挺自生知樂善好書清猷邁於兩獻

深仁厚義美化侔於二南可謂具瞻百寮儀型列辟朕
將永康兆庶方自友于天不憖遺奄從薨逝永惟仁範
哀慟纏綿用表非常之榮少寄天倫之戚可追贈惠莊
太子宜令所司備禮就加冊命陪葬橋陵

開元十二年十一月

岐王贈惠文太子制

褒崇名器所以尊德也光昭典禮所以飾終也況天倫
之愛親親之至乎故太子太傅上柱國岐王範特稟聰明
率由孝友好書不倦樂善無忘固已作則列藩儀型百

辟方憑魯衛之政，流雍睦之風。豈圖輔德，憊期殲良。奄及想同氣而莫遂，望驂駕而何追。言念平生，情深震慟。宜加殊禮之命，用寄孔懷之哀。可追贈惠文太子所司備禮，就加冊命。

開元十四年四月

慶王贈靖德太子制

追終悼往，久著於國。章考行易名，匪私於天。屬故司徒兼太原持節充河東道諸軍節度大使、度支營田等使上柱國、慶王保地，居長嫡道茂中和，爰在幼冲，克光撫

挹阮著讓賢之美愈聞禮樂之風加之雕琢文藝周旋
禮樂固力行以近仁亦因心而為孝自析珪祚土藩翰
式崇授鉞分符權畧斯遠年方在壯未虞夭喪疾瘵不救
憫惜良深宜循加贈之典式寵元儲之位可贈靖德太
子應緣喪葬一事已上宜並官供仍令太子少師韋紹
充監護使京兆尹裴士淹充副

天寶十一年五月

興王贈恭懿太子制

門下厚禮所以飾終易名所以表行況情鍾天屬寵及

褒封載疇加等之美式備元儲之贈永懷軫念有惻藝
章第十二子故興王佖毓慶璿源分華若木天資仁孝
神假聰明河間聚書幼聞樂善之旨延陵聽樂早得知
音之妙頃以暫嬰沉痾殆積旬時而資敬益彰穎悟逾
爽愛親之戀言不間於斯須苦訣之辭事先符於夢寐顧
惟至性實切深衷將祚上析珪載崇藩翰聞詩對易爰就
琢磨方冀成立豈期天喪瑤英始茂遽摧落於當春隙
駟俄遷忽沉淪於厚夜興言痛悼憫惜良深宜寵賁於

青宮俾哀榮於窀穸可贈太子謚曰恭懿應緣喪葬所
司准式仍令兼京兆尹劉晏充監護使少尹陶銳為副

主者施行

貞元元
年八月

齊王贈懷懿太子制

夫褒善飾終王者常典况我友于之愛手足之親永言
痛悼之懷用錫元良之命故齊王湊孕靈天宇擢秀本
枝孝敬知於孩提惠懷洽於親愛將固磐石遂分茅社
學探蟻術之精智有象舟之妙好書樂善造次不失其

清規置醴尊師風雨不忘其至敬方期鮎耆以保怡怡
天胡不仁殲我同氣念周宣好愛之分長痛莫追覽魏
文榮樂之言軫懷無已繇是稽諸前典式展追榮特峻
徽章表恩泉壤雖禮命之儀則爾而天倫之恨何攄遐
想幽魂宜膺寵數可贈懷懿太子仍命有司擇日備禮

追冊

開成三年正月

晉王贈悼懷太子制

王者重統紀尊儲副所以上嚴國本祇叶禮經睦人倫

以正邦典崇丕基而昭彝式其或德契元良思當追命
道雖間於存歿義有表於哀榮仰惟舊章用攄憫志故
開府儀同三司晉王普先帝冢楸間氣夙鍾孝敬發於
岐嶷溫仁形於襁褓翦珪分社光祝策於參墟錫土啟
藩假威尊於上黨朕頃戡內難謬屬與能以王齒在提
嬰事絕推讓方期就傳謂致修齡既因猶子之義俾膺
主宅之選天不憖遺殲我本枝泣悼永往空餘典禮嗟
樂善而莫報顧十起而何追銜悲長慟此誠無極是用

稽諸前訓申我宿愛布曩懷於茲日告如在於幽靈式
愴虛儀曷瘳深痛可贈悼懷太子仍令有司擇日備禮

追冊

大和三
年六月

冊贈

節愍太子謚冊文

維景雲元年歲次庚戌十月戊寅朔二十九日丙申皇
帝若曰咨爾故皇太子重俊業隆繼體才膺守器故辨
日高視晉儲防年遐吞漢兩撫軍監國皇基攸固齒胄

欽定四庫全書

唐大詔令集

七

問安聖圖惟永頃以讒邪浸潤恩禮踈薄外迫伊戾之
謀中啟驪姬之譖彼則克計斯甚搖動元良爾乃誠心
密運掃除悖德興晉陽之甲以罪荀寅擁漢闕之兵而
誅趙虜嗚呼逆首雖殄餘黨未靖屬投杼生疑亂兵旋
及朕代天理物推亡固存近勦四凶緬懷三善言徵備
禮以慰冥魂銀榜山門畫堂泉室三年遂遠上賓之馭
不留千載猶生全節之名長在存著徽烈歿有餘裕志
業若此痛悼良深宜加寵號用旌不朽今冊謚爾曰節

愍太子魂而有靈嘉茲茂典嗚呼哀哉

惠莊太子冊文

維開元十二年十一月甲申皇帝若曰於戲夫縉禮所以飾情崇名所以表德義存追遠愛洽因親故司徒申王撫^膺極稟靈邦家維翰體孝友以成性用淳和而合道沛獻受易率以鳴謙河間聚書時其好學加以出為方伯弘宣六條入登司徒大敷五教天則不愍奄薨於行留邸無期同輿遂遠興言哀痛震動於厥心夫先王

演親親之恩春秋著加等之義上嗣之位飾終斯在今
遣攝太尉侍中源乾曜持節冊贈王為惠莊太子宜率
茂典以永徽猷魂而有靈式昭哀贈嗚呼哀哉

惠文太子冊文

維開元十四年四月二十二日皇帝若曰於戲帝室之
幹昌降年不永天倫之戚而因心有加飾以徽章孔懷
之義也咨爾太子太傅上柱國岐王範孝友至性聰達
多才樂善為詞言行俱敏好學流譽經傳悉通德既訓

於東宮化且行於南國而輔仁或爽倚福無稽奄忽遷
殂震悼何及夫禮以情為體欲增追遠之數行以名而
尊是圖褒德之軌故擇茲茂典崇以上嗣言念逝者用
申友于今遣工部尚書攝太尉盧從愿持節冊王為惠
文太子魂而有靈昭是哀贈

恭懿太子冊文

維上元元年歲次庚子冬十月戊午朔四日辛酉皇帝
若曰於戲夫睦親加等有國之彝訓悼亡申恩中心之所

切是以增其縉禮漢藩追驚輅之榮備以徽章魏屏飾
龍旗之贈興言故典感惻良深第十二子故興王伯慶
襲紫庭憑華丹極溫良質其性本孝友稟於天成加以
神假聰哲身周藝美故方變樂眇音以洞微百家之書
經月而成誦年雖在於髫髻學已該於典墳自位列三
珪祚班五土綠車爰錫亟承䟽邸之榮青社云封實屬
維城之望豈謂藏舟易往過隙難留顧蘭坂而如昨痛
梧宮之遂掩况幼有至性實由生知心惟愛親歿不忘

孝幽夢克申於告訣至懇能貫於存亡言念淪喪尤深
憫惜是用叶茲純德贈以元儲夫恭者行之先懿者文
之美易名表稱俾永徽猷今遣銀青光祿大夫行中書
侍郎同中書門下平章事集賢殿崇文館大學士修國
史上柱國姑臧縣開國伯李揆持節冊命為恭懿太子
申予至感賁爾寵光雖倚門之懷永銜酸於碣館而告
柩之禮庶延渥於泉扃魂而有靈昭此哀贈嗚呼哀哉

哀冊文

懿德太子哀冊文

李嶠

維神龍二年歲次景午夏四月甲戌朔二十三日景申
懿德太子粹宮啟自洛邑將陪窆於乾陵禮也廡衣夕
陳俎奠朝設蜃輅俄軫龍旗按節皇帝嗟蟻庭之寢籥
惜鳳渚之韜簧撫萬乘而懷國本綏六姻而悼乾將情
無輟哀禮有加數刻純懿於金版播芳聲於玉牒其詞
曰靈命將興元符是膺皇基茂立帝武丕承祥集畫堂
慶流朱邸棘天延貺祠圭備禮實惟天族載挺人英川

寶岳秀虹暉霓精舞象得玄佩觴聞道刻舟敏遽牽衣
慧早幾神闇體理識宣資心韜鍾律情含蔡著曰仁曰
孝非訓非師寬惠深博溫良肅祇苞舉六文網羅羣籍
詩接楚彥賦延梁客淮國傳騷雲臺對易樂善超羣多
才掩昔乃崇匡衛實屏實藩乃列朝請為鴻為鴈揚聲
北路振彩西園儀表姬戚光輝舜門恭事閭闔歡迎黨
族怡色玉潤溫詞蘭馥中外克諧親踈允睦常德有裕
間言無譴榮深出幸寵茂留中婉孌羣辟調繆二宮陪輿澤

厚錫馬恩隆西蜀欽義南山向風禮縉天孫望高元嗣
重海關象前星虛位方輟須尋行膺主器奄喪門軸俄
摧隙駟嗚呼哀哉鳳下朝陽龍收暝光瓊田滅彩桂苑
淪芳國軫傾翰朝悲壞梁惟靈徵之寂寂怨天道之茫
茫嗚呼哀哉玄聖登期恩榮下賁爰命典策式昭名謚
七宅雖崇榮盛不莅闔壤同戚具寮增欷嗚呼哀哉築
恩臺兮竟不旋還作室兮復何年訪來人兮傷對日瞻
雲鶴兮感昇天惜明離之虛繇悵鳳樂之徒懸懟銀榜

之留月泣銅樓之送煙嗚呼哀哉司兆獻占掌圖辨域
挽鐸初警帷幌既飭引文衛之邇迤度繁笳之悽惻纏永
慕於青府結餘酸於紫極嗚呼哀哉辭交風之近甸出
避雨之層巒望八水而遙集懷三川而顧難菱枯兮夏
旱花落兮春殘林野晦而天無色烟雲愁而景欲寒嗚
呼哀哉稅駕昭塗即宮下土執斧供事揚麾按部藏日
兮山門埋燈於地戶痛平生兮冥漠哀條忽兮今古視
不見兮聽不聞天無曉兮夜無分同變化兮光陰盡配

陽秋兮蘭菊芬嗚呼哀哉

節愍太子哀冊文

維景雲元年十月朔日子節愍太子梓宮自鄆杜粵其
日將陪窆於定陵禮也蜃衛初引鳳仙將遠閱少海而
不流赴窮泉而莫返皇帝懷副君之大義降猶子之深
慈節忠烈於逝者備哀榮以送之漢幄虛侍周牆肅事
思臺空築幽埏永閔金相兮玉裕揆行兮旌能峻節兮
無泯芳聲兮有恒其詞曰景雲流祉白水貞祥祀及百

代威加萬方勃焉家國赫矣皇王帝子攸降乾男以將
邁德誕靈懷文抱質漢臺占雨秦京近日敏對不羣能
言罕匹藝該百變詞含六律朝霞自舉夜月常遊醴薦
推穆書成重鄒典戎仙衛作牧神州是謂元子光膺孟
侯少陽正位太學知道春誦夏絃尊師敬老榮承圭玉
寵殷瑜珮三善不忘四章旋逮過闕則下入廟斯趨曰
仁與孝終始不渝聖敬日躋溫文歲廣望高周副才優
魏兩用事有倫出言無黨政成中外聲溢天壤邪臣作

蠱匹夫知愧不顧身遊將夷國難忠義期仗敵謀是斷
獲戾宮朝歸魂霄漢白駒過隙蒼蠅止藩水逝西沼霜
凋北園鵲闕誰馭鳩里徒冤瞑目於此傷心詎論嗚呼
哀哉重日淪輝前星墜彩形神溘謝德音如在物是人
非年移運改聖明延鑒徽章有待有待伊何慶逢開闢延鑒
伊何恩隆典冊即鳴鳳之岡嶺啟占鳥之隧宅人辭中
壘之桑鳥思平陵之柏地如伊水山連紀市嗟委化於
仙期欲問安於神里五營成列萬國銜酸挽鐸朝唱旌

麾曉寒指牽牛以南渡乘飲龍而北僂顧青舍兮非春
掩玄扉兮大暮昔之來兮銀榜銅樓今之往矣曠野荒
丘冉冉兮辰促蒼蒼兮道悠惟聲華與純懿比金石而
恒留嗚呼哀哉

惠莊太子哀冊文

張九齡

維開元十二年歲次甲子十一月丁巳朔二十四日庚
辰司徒申王薨於行在所冊謚惠莊太子旋殯於寢輿
閏二月二十七日壬午將陪葬於橋陵之栢城禮也黼幕

宵布羽纛宿設西序啟攢南省成列皇帝深天倫之慶
崇后儲之禮擬容衛於青宮中孔懷於朱邸爰命史氏
於稽令則無俾直言不彰遺德其詞曰昊天有命先后
受之分王子弟藩衛京師克荷成憲罔不肅祗懿哉明
哲誕惟純粹宣慈日間孝友天至道則昭合跡無自異
性則生知學兼時習易微書遠詩興禮立德必有隣善如
不及貴而能損重固難挹方伯出鎮召南取斯司徒入
掌鄭武其宜義之所在政務克施物留遺愛事著成規西

夏心人東征叶卜韡韡同輦皇圖改服疾邁中路凶傳
左轂寧不慙遺奄鍾斯酷嗚呼哀哉昔在冲妙具惟兄
弟四國並封五王均體遊必連騎居則同邸各承命於
含飴俱受經於置醴既荏苒而云邁屬殷憂於將啟實
定禍於蕭牆遂繼明於雲陛雖隔深宮之衛常洽家人
之體曷徂謝以痛心感平生而流涕嗚呼哀哉爰擇茂
典將崇上嗣表先聖之元良申友于之褒異紛綯簿以
徒設儼文物而空備彼神儀之如在乃羣悲之所萃周

禮從祔漢瑩是陪先遠日而撰吉會同盟以送哀夜漏
盡兮暗室啟庭燎殘兮曉輓催既三接而徐進將一去而
不迴嗚呼哀哉背朱門兮遲遲馳白驥兮駸駸野蒼茫
而助慘風蕭颼而增悲離離兮素蓋寂寂兮畫帷遵舊
迹而何有覽陳迹以如疑面都邑於不入侍陵寢兮有期
惟光儀之永閔與昭代而長辭嗚呼哀哉潛清輝於幽
窆昭鴻名於美跡將在皇儲之史豈伊諸侯之冊播遺
芬於蘭桂傳不朽於金石諒紀言之在茲庶德音之無

數嗚呼哀哉

惠文太子哀冊文

蘇頌

維開元十四年太歲景寅四月乙酉朔十九日癸卯太
傅岐王薨於洛冊謚惠文太子殯正寢之西階仲夏景
申將祔於橋陵禮也曉陰北清魄月西照列鐸挽以嚴
鼓出軒除而減燎皇帝戚深天倫寵異天人追遣奠於
將遠動哀懷其若新震以貞位文以光謚爰召司存迺
甄遺懿其詞曰重玄之門唐系居尊五色之土岐封效

古瑤圖正位兄一弟二寶萼承庇帝三王四嘗急難兮
特詢以事竟扶翼兮能竭其志其志伊何程才則多武
以之靖文以之和勇超東牟思奪東阿是曰其爾曷云
其他覃訏守成忠肅鍾美克順克比為臣為子河書聚
學沛易窮理毫使露濡賦令雲起出咨岳牧入慎邦紀
魯衛則侔武桓斯擬傳於元嗣欽若端士往錫朱旂來
朝紫微家人輯穆藩后增輝甘旨不同而不膳珍華不
供而不衣楚謀或隱梁藉寧遣屬巡岱以封還待升天

而慶歸猗那兮揚名於後於鑠兮循業可久富貴兮於
何不有閭忽兮曾莫之壽嗚呼哀哉宵半分漏革傳於
奏天初辨時慮切乎思駿馬連踵而交使近臣駢命而
挾醫望君王兮何遲遲俯櫺檻兮猶若期至不至兮款
長辭莫悲兮惟此悲外皆罷輟兮內獨漣洏豈吾李之
在哉崇后儲以謚之孝依喬岳仁本京師莊洎文兮疇
能忍茲靈輜稍發清道徐按整承華之鹵簿愴德陽之
宮觀樹陰陰於國門橋耿耿於天漢盈蘊悲以迴復蓄

新哀以聚散訖然嗣王若不勝喪慘天地之何心怨關
心之已長夫儉之為德謙固其則存歿是膺惠文是徵
存也高臺深池之不競歿也備物重器之不矜嗚呼哀
哉典冊之有憑惠文之有稱故奉先皇之松柏成太子
之園陵嗚呼哀哉

惠宣太子哀冊文

韓休

維開元二十二年歲次甲戌七月庚申朔十日己巳故
司徒薛王薨於洛冊謚惠宣太子翌日殯於正寢之西

陪粵八月二日庚寅將陪葬於橋陵禮也涼陰戒秋白露凝夜傳哀挽於郊道儼虛容於池榭皇帝痛棣華之既凋覩蘭坂而增歎撫徹奠以無及恨潛泉之永閤光於典冊昇彼儲嗣爰命史臣颺言其懿其詞曰於昭帝系濬發玄裔建堯升唐自薛而王粵有成德遂荒東國大啟土宇聿崇典則夫其秉靈在初廸哲惟濬惇敏秀鑠淳龐淑慎謀謦以成蹈道而順文英獨越武烈惟振百辟式瞻五帝以訓惟茲大賢克懋天秩為藩為屏是

輔是弼保釐我邦家左右我王室沛獻演易楚元說詩
藝無不綜學罔有遺分以寶玉建其旌旗出弘聲政入
贊雍熙咨爾公族是惟敦睦主曰介弟寵其車服俾侯
於京怡怡弟兄穆以家人之禮崇其藩后之榮曷常不
樂彼同輿却東平之歸奏詢其異政欽北海之能名將
以天倫之愛可以昭於載籍友于之誼可以貫於神明
宜其善有其慶禍無其胎享此眉壽祐其多才胡勿藥
以為疾逮彌旬而成災躬為禱兮靡不至誠以精兮無

不備走羣祀以累祈徵上醫而畢洎蒼黃而晦明未隔
門忽而古今斯異嗚呼哀哉神理無昧人寰已非想河
洛其猶在望淮仙而不歸悲由中而自切情限禮而相
違悵丙舍之去遠飾承華以增輝嗚呼哀哉靈龜肇吉
服馬先路悼津門之永違遵河橋以直度笳哀洛陽之
道旒靡咸京之樹換憂歡於今昔變風景於新故嗚呼
哀哉夫行以謚尊恩由禮盛申備物以增飾緬貞徽而
獨映俾重為善之名以彰有後之慶嗚呼哀哉庭樹撼

以驚秋川波咽而不流歷神臯兮望國寢背華宇兮歸
山丘流塵滿兮虛榭暗綠苔生兮行徑幽惟盛德與鴻
烈亦天長而地悠嗚呼哀哉

恭懿太子哀冊文

維上元元年太歲庚子六月己未朔二十六日甲申皇第十二
子持節鳳翔等四州節度觀察大使興王侶薨於中京之內
邸殯於正寢之西階粵八月丁亥冊贈皇太子廟號恭
懿冬十有一月庚寅詔葬於長安之高陽原禮也驚隧

開封龍輜進轍陳祖載而就位嚴塗芻而成列皇帝哀玉
林之閔景憫璿萼而罹霜瞻蜃綽而增恩懷雁池而求傷
考謚惟古褒崇有式爰詔史臣恭宣懿德其詞曰維天祚
唐累葉重光中興景運再紐乾綱本枝建國磐石疏疆克
開聖胤實曰賢王驪源孕彩日幹騰芳深仁廣孝蘊藝含
章秀發童年惠彰髻齒蹈禮知方尊賢叶旨對日流輝占
風繼美魯衛後塵間平絕軌冠孽初構王師未班爰從襁
褓載厯難艱愛備中掖名崇懿藩居常稟訓動不違顏禮

及佩觿朝加分器昨土延渥登壇受帥璫室金箱文經武
緯樂善為寶崇儒是貴濬哲外朗溫文內深閱書成誦觀
樂表音五經在口六律諧心才優藝洽絕古超今蛇豕猶
梗寰區未又總慮其真焚香演偈食去葷血心依定慧庶
福邦家俾清凶穢霜露嬰疾聰明害神沉疴始邁彌曠盈
旬正慮無擾發言有倫在膏方亟問膳愈勤雲物告徵星
辰變象楚藥無救秦醫莫仗靈儀杳而上賓徽音邈其長
往違舊邸於青社即幽陵於黃壤嗚呼哀哉魂氣奪兮去

何之精靈在兮孝有思痛君親之永隔託夢寐而來辭延
桂宮而震悼貫椒壺而纏悲旌遺芳於碣館賁新命於儲
闈嗚呼哀哉先遠戒候占龜獻吉指鶉野而西臨背鳳城
而右出天慘慘而若霧山蒼蒼而翳日揚薤挽之哀悽盼
松挺之蕭瑟羅烏伏以禮峻掩黃腸而室密望馳道而長
辭赴幽途而永畢嗚呼哀哉生為寵王兮宸愛所鍾歿追
上嗣兮朝典斯崇昇玉笙於洞府閱銀榮於泉宮金石惟
固兮人生有終簡冊攸記兮德音無窮敢陳詞以篆美庶

永代而承風鳴呼哀哉

昭靖太子哀冊文

蕭昕

維大厯八年歲次癸丑正月乙亥朔十七日辛卯開府
儀同三司元帥鄭王薨旋殯於內侍省二十七日甲午
冊謚曰昭靖太子洎十年歲在乙卯十二月庚申朔二
十六日乙酉遷窆於萬年縣細柳之北原乃詔京兆尹
黎幹監護喪事展飾終之儀禮也嗚呼哀哉窮陰肅烈
煞景凝沍蜃輅方中龍駮在御設庭燎以終夕啟攢途

而卽路皇帝悼賢王之不淑念愛子之云亡齊彭殤以
理遣顧形影而神傷錄舊勲於藩邸議新謚於太常
承家於七鬯追嗣位於元良爰命侍臣式纂遺芳其詞
曰維昔啟土膺茲冊命錫爵爲王建封於鄭梁國寵異
魯邦禮盛明哲在躬溫良成性國步艱難邁茲師旅克
生才藝允是文武乃拜元戎俾殲醜虜職思靖亂功期
禦侮守師律以殿邦振威聲而先舉問安內豎視膳寢
門隨肩明兩順色晨昏光輝棣萼友愛鵠原率禮不違

人無間言招賢南楚愛客西園宗子維城王室以藩樂
善未終沉疴斯起羣望並走衆鑒咸理有加無瘳蘭銷
玉毀馳光度隙逝川閱水軫皇慈之恒化嗟國人之罷
市嗚呼哀哉疇庸未紀度德則優崇以徽號闡其謀猷
善則可旌禮無不酬吉凶同域神理難求列前星之儲
位招甲觀之靈旂撰日月以有時備塗芻之將命卜窀
從吉辨方居正董原霜若從阡雪映起寢廟之崇嚴制
園陵之尊盛嗚呼哀哉輟車發軔緹騎前旌祖載奠撤

嘯笳哀鳴挽出離宮路迴直城羽儀以列徒馭不驚越
素澹以東指背東山而北征聯岡走以迴抱遠樹靡而
低傾對驪宮以立表依細柳以開營閼重扃於寥壤悲
執紼於桓楹川杳杳以暝色野稍稍以寒聲仰清芬之
不泯實昭晰於鴻名嗚呼哀哉

莊恪太子哀冊文

維大唐開成三年歲次戊午十月乙酉朔十六日庚子
皇子起薨於少陽苑十七日辛丑遷座於大吉殿十一

月乙卯朔二十四日戊寅命冊使太子太師兼右僕射
門下侍郎國子祭酒平章事鄭覃副使中書侍郎平章
事楊嗣復持節冊謚曰莊恪十二月乙酉朔十二日景
申葬於驪山之北原莊恪陵禮也玉琯歲窮金壺漏盡
祖奠告撤哀笳將引庭滅燎而月寒路搖旌而風緊皇
帝念主鬯之缺位悼佩觿之天年銅樓已閉銀榜徒懸
方追思於對日遽冥冥而賓天典冊具舉文物咸備爰
詔侍臣顯揚上嗣其詞曰皇矣帝緒肇基綿古種德尊

道宗文祖武上聖開成天下和平儲祉發祥是先元良
覃訏之初岐嶷用彰蘊才游藝玉裕金相既免孩提是
加封殖伊維城於東魯錫介珪於上國辭榮朱邸正位
青宮尊師重保養德含聰畏馳道而不絕問寢門而益
恭招賢警戒齒冑謙冲冀日躋於三善奉天慈於九重
漢明好學既顯於外魏丕能文方循於內美不二於顏
過嘉得三於鯉退焜輝甲觀鏘鏘瑜珮方積善於為山
何反真而游岱嗚呼哀哉憂兢損壽沉疴始邁羣望並

走百靈宜祐吳客之問徒為越人之醫靡救占前星之掩
耀知東朝之降咎天垂象而則然人由已而何有嗚乎
哀哉稅駕承華兮即宮夜臺鳳笙長絕兮蜃輅徐來啟
青門而東出歷元霸而左迴度凋林兮魂斷入曠野兮
心摧水助挽而幽咽雲帶翼而徘徊悲佳城之已掩見
新廟之方開嗚呼哀哉授經兮曷期執紼兮增欵九原
作兮何嗟及七日還兮安可希有少海之波逝無西園
之蓋飛商山之羽翼已散望苑之賓客咸歸瑟彼玉簡

閱於泉扉用傳信於文字願不泯於音徽嗚呼哀哉

罷祭

停官祭太子勅

勅諸贈太子頃年官為立廟并致享祀雖禮欲歸厚而情且未安蒸嘗之時子孫不預若專令官祭是以踈間親遂此為常豈云敬孝其諸贈太子有後者但官為置廟各令子孫自主祭其祭署及官悉停若無後者宜依

舊

開元二十二年七月

唐大詔令集卷三十二

欽定四庫全書

唐大詔令集卷三十三

宋 宋敏求 編

諸王

封建

封周王顯制

封申王成義等制

封郯王嗣直郢王嗣謙制

封陝王嗣昇制

改封寧王憲制

封濟王湓等制

廣平王進封楚王制

改封雍王适制

封睦王建等制

封欽王諤等制

封鄧王寧等制

封沔王恂等制

封晉王普制

封魯王永制

封梁王休履等制

封蔣王宗儉制

封棣王惲制

封鄂王潤制

封衛王濯等制

封斬王緡等制

封棣王祔等制

封景王祕等制

封雅王禎等制

封建

封周王顯制

昔周武垂則汾邑啟維城之固漢文永統睢陽樹磐石之基所以作鎮邦家克隆景業第七子顯毓粹雲峯分

輝日觀風儀秀舉神識冲和挺玉質而含章振金聲而
發彩夙遵教於詩禮方導德於間平既表岐嶷之姿宜
申珪社之貺可封周王食邑一萬戶

顯慶二年二月

封申王等制

蘇頲

門下古者帝王受命以臨萬國子弟建封用尊五等其
所由來尚矣右衛大將軍衡陽郡王成義等敦詩執禮
本仁祖義名教之樂自得幾深溫良之容發於忠孝晨
趨魏闕則望掩軒霞夕賦曹園則思含澄景朕祇奉歷

數旁稽載籍克輔王室所謂通邑大都俾為唐藩故能
帶河礪嶽分膺往命咨爾眷歟可依前件仍各食實封

一千戶

唐隆元年六月二十七日

封郾王郢王誥

誥昔在姬劉分王子弟用能本枝碩茂算祀遐長皇帝
元子嗣直嗣謙等若木分暉咸池疏派孝愛成性佩服
天經岐嶷誕靈風儀遐舉奉聞詩之寶訓資樂善之芳
規錫命惟崇已申綠車之寵登庸在運宜開朱戟之蕃

嗣直可封為郢王嗣謙可封為郢王

先天元年八月

封陝王誥

誥皇孫之寵禮絕於諸侯帝王之制封殊於列國爰自
前代茲義存焉皇帝第三子嗣昇岐嶷夙成聰明天假
東海壽街之對昔未云奇瑯琊日遠之談今可連類允
宜昨茅土光彼磐石永固鴻業式繼維寧可封為陝

王

先天六年九月

改封寧王制

爰分寶玉載錫綏章必在親賢致之侯甸開府儀同三
司兼涇州刺史上柱國宋王憲儀表碩望忠肅令名藝
總經書才推禮樂列上公之位兼大藩之寵瞻彼行圍
舊稱茅邑敦如北地今邇西都宜考良日之封用弘景
命之及可改封寧王食邑三千戶餘如故

開元七年九月

封濟王等制

王者之制疇庸展親古之道也迺眷諸子非曰私之第
二十三男溢等藉慶昌源致茲繁祉始自內保漸乎外傳

四方六甲辨志離經可以識君臣之義可以接朝廷之
禮宜建以方社錫之分器肆予有命克慎厥猷其封溢
為濟王汙為信王泚為義王濯為陳王澄為豐王漣為
恒王浞為京王滔為湓王

開元二十一年九月

廣平王進封楚王制

自寇戎奸宄王師未振瞻言境邑尚聚犬羊廣平王倂
修學好古令德孝恭志安邦家誓雪讐耻爰鞠其旅克
復二京可封楚王食實封二千戶

寶應元年三月

改封雍王制

錫瑞剖珪義先藩屏離疆畫野禮叙推恩必因時以命
拜協天性以為輔天下兵馬元帥特進上柱國魯王适
識度明敏執心仁恕智侔對日位偶前星頃以俾侯於
魯兼掌戎車修禮檢身流謙自牧元良有裕忠孝可嘉
且傳稱知子之道禮擅內舉之文眷彼龜蒙僻居東夏
乃惟洛雍近接西周宜改邑於京闕列維城於上國可
改封雍王食邑一萬戶依前充天下兵馬元帥本官勲

如故寶應元年八月

封睦王等制

虞夏之制諸子疏封漢魏以還十連授律是用析珪班瑞
磐石開疆信逋邑之紀綱為中都之屏翰然則旄鉞之寄
惟擇攸難因親之任各膺其命第四子述第五子逾第六
子連韓王迥第八子邁第十三子造第十四子暹第十五子
運第十六子遇第十七子適第十八子通第十九子達第
二十子逸等敏茂純懿稟於衷誠溫良孝恭形於進對

動皆合義居必有恒可以附衆靖人撫封宣化而總列城之
賦擅分閭之謀允勤公家允輔王室今則均茅社之寵盛
槐庭之儀授鉞登車副茲朝典維城之固爾其懋哉述可
封睦王充嶺南節度支度營田五府經畧觀察處置等大
使逾可封柳王充渭北鄜坊等州節度大使連可封信王
韓王迥可汴宋等州節度觀察處置等大使邁可封鄜王
造可封忻王充昭義軍節度觀察處置等大使暹可封韶
王運可封嘉王遇可封端王邁可封循王通可封恭王達

可封原王逸可封雅王仍並可開府儀同三司

大歷十年二月

封欽王等制

王者之制子弟畢封所以固藩輔而重社稷古今之通義也第十弟諤等寬簡忠厚生知孝敬行皆由禮志不違仁樂善本於性情好賢宗於師傅朕承天之序稽古褒親宜舉徽章俾開土宇第十弟壽欽王第十一弟誠封珍王男建康郡王渙封郟王改名經洋川郡王沔封均王改名緯臨海郡王洵封淑王改名縱弘農郡王浼封

莒王改名紆漢東郡王泳封容王改名綱晉陽郡王湜
封邠王改名總高平郡王淑封邵王改名約雲安郡王
滋封宋王改名結宣城郡王淮封集王改名緇德陽郡
王濬封冀王改名綵河東郡王浥封和王改名綺第十
七男絢封衡王十九男纁封會王二十男綰封福王二
十二男紘封撫王二十三男緄封岳王二十四男紳封
袁王二十五男綸封桂王二十七男綽封翼王

貞元二
十一年

四
月

封鄧王等制

門下昔周室制法備建宗盟漢代垂統畢封子弟其盛也二南教化首在國風其詳也九國土疆載於侯表朕嗣守丕業恭惟令圖永言磐石之固宜本介人之重男平原郡王寧等孝友忠敬溫文惠和稟其樂善之姿強於好古之學君親之教罔敢失墜保傅之言亦惟佩服由是寡悔至於通方庶可膺茲典章列是藩屏疏爵以冠於侯伯分茅以錫其山川用明至公且叶前訓男平

原郡王寧可封鄧王同安郡王寬可封涇王延安郡王
宥可封遂王彭城郡王察可封深王高密郡王蒙可封
洋王文安王寮可封絳王十男審可封建王宜令所司
擇日備禮冊命王者施行

元和元年
八月七日

封沔王等制

門下朕獲承天序欽若前訓用建藩輔以明親賢斯古
先哲王之令典也弟憬等孝友寬厚溫文肅敬行有枝
葉道無緇磷踐君子之中庸究賢人之義理情惟樂古

志不近名纂間平之令德希曾閔之至行宜分建茅土
衛我邦家叶於展親永固磐石是用舉其成命錫其徽
章第十弟恂可封沔王第十一弟懌可封婺王第十二弟惜可
封茂王第十三弟怡可封光王第十四弟協可封淄王
第十五弟憺可封衡王第十六弟悅可封澶王長男湛
可封鄆王第二男涵可封江王第五男瀍可封潁王宜
令有司備禮擇日冊命主者施行

長慶元年三月

封晉王制

門下昔周室之興也藩戚並建式資於維城漢氏之興也皇子畢封用固於磐石斯所以載弘丕緒惟懷永圖且茂德於本枝遂推恩於後嗣况祇荷眷祐屬當長賢宜承龍章允膺舊典長男普幼稟異質夙膺嘉祥既表岐嶷之姿日慕恭良之性朕以寡昧虔奉宗祧庶明父子之親以及君臣之義命以樂國錫其分圭用敷可久之基爰叶至公之道可封晉王宜令有司擇日備儀

冊命主者施行

寶歷元年十一月

封魯王制

朕恭承寶位欽若璿衡兢業戒懷懼泰洪構今皇嗣誕
秀既流慶於天枝白茅啟封宜分王於土宇用崇大典
式固丕圖長男永植性端莊稟靈聰哲神氣挺於岐嶷和
粹精於儀彤姿範藹然是用嘉慰將奉聞詩之教冀彰
樂善之風俾洽寵恩允膺錫命庶表祥於麟趾爰建社
於龜蒙敬哉戒哉無忝我烈聖之休德可封魯王仍令

有司擇日備禮冊命

太和四年正月

封梁王等制

王者胙土畫疆封建子弟所以承衛帝室藩茂本枝祖宗成式朕曷敢廢況天付正性夙奉丕訓尊賢好善體仁由禮是可舉建侯之命膺分社之榮親賢是乎在敬宗皇帝第二子休復第三子執中第四子言揚第六子成美皆氣蘊冲和行推敬慎游泳

原闕

墳素佩服師言

宜開土宇之封用申睦族之典休復可封梁王執中可

封襄王言揚可封杞王成美可封陳王宜令有司擇日

備禮冊命

開成二年八月

封蔣王制

周宅土中藩衛並建漢有天下子弟畢封朕承烈聖之
鴻構託於兆人之上順考古道用保乂於皇家第二男
宗儉孝友齊莊恭肅明懿蹈師氏之典訓佩古人之格
言動必有程稚不好弄遵道誠資於積習樂善寔本於
生知洪量不矜芳猷自穆是宜光分茅社作我藩翰式

發麟趾之祥欽若犬牙之制爰舉成命錫其寵章可封

蔣王仍命有司備禮冊命

開成二年八月

封棣王制

門下朕聞王者建極子弟胙以茅土將以藩昌磐石深
固本根周漢之隆率由此道及我列聖每用舊章所以
撫安生靈保佑中外朕恭承天序敢紊前規爰加立愛
之恩庶廣推公之義憲宗第十八子惲生則溫柔性惟
聰達神邁氣朗聞禮知方蘊積中之粹和資奉上之孝敬

必能副於友愛始終令圖以耀金枝以輔王室是命俾
開朱邸盛建戚藩載啟唐虞之風用崇麟趾之慶於戲
惟茲盛典用別親賢必思繼美二南紹休五等佩維城
之重思外屏之尊無怠無荒服我不命可封棣王仍令
擇日備禮冊命

大中六年十一月

封鄂王制

蔣仰

門下周家受命諸子疏封漢氏造邦二等垂訓式宗藩
屏思固本根逮於國朝必稽典憲太宗創久長之業乃

建親賢列聖遵守成之文廣分土宇朕獲承丕構敢廢
舊章非惟永保於皇基蓋亦無私於天下第六男潤生
而聰敏性則溫恭孝敬夙彰誠明自至能服詩書之教
居然禮義之姿雖在幼年勤由義訓周旋知為善之樂
謙和無自伐之心是可以膺犬牙之封厚麟趾之慶授
以茅社錫其桐圭俾爾戚藩以輔王室亦宜維二南之
慶躅習三雍之舊儀敬服斯言用光禮命可封鄂王令

所司備禮冊命

大中五
年六月

封衛王灌等制

門下朕聞先王建萬國親諸侯也周漢封藩樹屏我國
家以錫土分茅冲人敢易彝制爰稽典禮式固家邦第
三男灌等生則岐嶷幼而狷齊忠厚實見其天資才識
若符於神授敦詩聞禮不假其師嚴踐義由仁罔勞於
庭訓術通六藝之妙學興百代之書是宜敷桐葉之策
舉梓材之誥昨以土宇誓以河山我圖爾居以謹王度
無懈其位永孚於休第三男灌可封衛王第四男灘可

封廣王宜令有司擇日備禮冊命主者施行

大中十一年六月二

十八日

封蘄王等制

門下朕祗承祖業獲奉寶圖常欲茂枝葉於千齡壯根本於九族所以建茲茅社分命親賢叅酌令儀用垂嘉稱順宗皇帝第十八子緝憲宗皇帝第二十子情瑤源挺秀朱邸傳芳生於宮壺之中雅得詩書之興加以溫恭成性孝敬日聞不假保傳之嚴已彰間平之德是宜

疏封大國屏衛本朝錫介圭於明庭固磐石於清廟於
戲謹爾侯度敬我典章無怠無荒往承休命緝可勦王
情可榮王仍令所司擇日備禮冊命

咸通二年十一月

封棣王虔王沂王遂王制

陸扆

門下我國家奄宅中區光啟祖業析珪胙土惟賢與親
故本根茂而枝葉榮王室尊而藩屏壯逮予眇末罔獲
纂承願至道之玄慈鍾列聖之餘慶顧茲胤嗣實謂蕃
昌爰稽典謨用建邦土第三男昶星辰毓粹岳瀆降靈

早彰岐嶷之姿克稟狗齊之慶第五男禊龜龍應瑞鵬
鷲凌空溫恭自得於天和穎悟實由於神賦第六男裡
璆琳挺秀鸞鸞呈祥爰當好弄之年雅號夙成之器第
七男緯珠璣耀彩箇落含貞風神潛茂於端莊質性已
彰於敏惠而皆生知孝敬志樂文儒問安靡曠於晨昏
稟訓每由於詩禮智有刻舟之妙辨多對日之奇是宜
分以白茅錫其朱邸叶犬牙於漢制光麟趾於周詩厭
次名邦境連於齊魯南康輿壤土接於荆吳瑯琊敦儒

素之風遂寧實阜殷之俗咸稱重地各服徽章於戲器
以琢成道由學顯勉稟君親之教敬承友傳之規勿追
平樂之歡無好任城之勇懋建厥德無怠無荒祠可隸
王禋可虔王禋可沂王禋可遂王仍令所司擇日備禮
冊命主者施行

乾寧元年十月

封景王輝王祁王制

門下昔明王臨御之理立德於至道茂緒於惟親朕嗣
守丕圖祇若鴻訓未嘗不稽古建於邦家厲精以奉宗

祖況洎漢而還封冊之重抑有前典煥乎彝章當知子
之取私亦內舉之良媿第八男祕粹和包美謹厚自居
踐禮樂之德文佩詩書之義府第九男祚生而向善夙
賦好謙克明教導之風蔚有端莊之質第十男祺後星
增潤甲觀呈祥妙彰岐嶷之姿雅得聰明之性又並標
嘉器皆稟溫文慰沃且多寵數宜舉爰擇重地式崇其
名於戲恭乃修持服諸訓順俾盛磐石之固允膺典禮之
崇勉樹令徽各欽休命祕可封景王祚可封輝王祺可

封祁王

乾寧四年十月

封雅王瓊王制

張元晏

門下成周之建藩翰也本以宗盟大漢之分茅社也先
諸子弟推強幹弱枝之義遵自家刑國之文用能夾輔公
朝尊獎王室朕上承宗廟下撫黎元固安萬邦惠綏羣
品事必在於師古理寧繫於徇私爰舉舊章式於令典
十一男禎忠肅挺志清明在躬孝敬本於生知端粹資
乎神授蘊題鞭之妙思纂置醴之前規第十二男祥美

秀呈姿溫文毓德體寬雅以成性恃愿恭而立身踵為
善之懿圖繼好學之休譽咸在懿猷克守義方必當益
茂清徽俱為令器是用各分圭瑞並列封疆中以渥恩委
之善地於戲當綺紉之歲膺茅土之榮雁序聯芳犬牙
錫壤爾宜簡以蒞衆儉而在公善友應徐敬師申白交
修魯衛之政俾取虞芮之風往惟欽哉服我丕謀禎可
封雅王祥可封瓊王仍令所司擇日備禮冊命主者施

行
光化元年
十一月

唐大詔令集卷三十三

欽定四庫全書

唐大詔令集卷三十四

宋 宋敏求 編

諸王

冊文

冊梁州都督漢王元昌文

冊徐州都督徐王元禮文

冊荊州都督荆王元景文

冊潞州都督韓王元嘉文

冊遂州都督彭王元則文

冊雍州牧左武侯大將軍越王泰改封魏王

文

冊洛州刺史鄭王憚改封蔣王文

冊岐州刺史許王元祥改封江王文

冊揚州都督沛王賢文

冊殷王旭輪文

冊翼王輪文

冊汴王邕文

冊魯王求文

冊魏王侑文

冊涼王健文

冊蜀王倓文

冊景王祕文

冊輝王祚文

冊祁王祺文

冊雅王禎文

冊瓊王祥文

冊文

冊梁州都督漢王元昌文

岑大本

維貞觀十二年四月己卯皇帝使某副使持節冊命曰
於戲夫易陳利建道貫三才傳稱夾輔業隆百世是以
周之魯衛式固維城漢之梁趙克隆磐石惟爾使持節

都督梁洋集壁四州諸軍梁州刺史漢王元昌幼聞教
義器識聰敏早開土宇禮數優崇過矣南郊襟帶西蜀
按部之重茂親是寄持民之譽期月有聞是用錫以茅
賦備茲典冊爰誓山河永作藩屏朕聞曰事君盡禮資
於孝敬為政以德始於仁厚故士無貴賤由之者揚名
時無古今背之者殄行欽哉爾其執心於忠孝踐行於
儉約無好逸豫以犯非禮無縱嗜欲以邇宵人明率舊
章永保疆土可不慎歟

冊徐州都督徐王元禮文

於戲惟王建都惟聖垂範安兆民者實敦親戚固鴻業
者必樹藩衛惟爾使持節都督徐譙泗三州諸軍事徐
州刺史徐王元禮器能明敏業履詳和幼聞詩禮早膺
車服海岱及淮俗兼齊魯昨土按部僉曰爾諧是用斟
酌前代率由令典俾屏廼辟傳爾後昆朕聞曰友于兄
弟施於有政弗學面牆蒞事維煩緬求大訓茲為要道
往欽哉爾其執心於忠孝踐行於儉約無好逸豫以犯

非禮無縱嗜慾以邇宵人明率舊章以保疆土可不慎歟

冊荊州都督荆王元景文

夫建官之道實資明德列尊之義必俟茂親故晉鄭佐周功宣於寅亮間平輔漢業崇於藩屏惟爾業高雍肅器懷恭懿幼稟庭訓早膺朝寵仁恕聞於封畿廉平著在方岳荆衡作鎮江漢為紀包括巴漢之域跨躡吳越之郊實帷爾諧分珪僉屬備茲令典錫以休命奄於楚

旬代為唐輔可不慎歟

冊潞州都督韓王元嘉文

岑文本

維貞觀十二年於戲肇自黃唐洎乎漢晉莫不敦穆親戚任用能賢咸胙疆土世為藩翰惟爾持節潞沁韓澤四州諸軍事潞州刺史韓王元嘉識量沉厚德業尚修整夙稟趨庭之訓早膺錫珪之寵上黨與壤地連秦晉開國之典攸歸按部之譽允穆是用率由故實光備典章式固維城傳之永世朕聞詩書禮樂仁義之府也孝友忠

信人倫之基也是以河間之賢在於修學東平之譽成
於為善往欽哉爾其覽載籍之旨求聖賢之訓戒茲邪
僻以仁厚為心儆彼怠荒以重慎為德明乃服命勿替
敬典可不慎歟

冊遂州都督彭王元則文

岑文本

於戲蓋五等肇自帝軒殷周不改其制六條創於有漢魏晉
必循其道是知選賢建威莫先於藩衛經邦致治允資
於創舉惟爾使持節遂普果合四州諸軍事遂州刺史

彭王元則幼稱岐嶷夙稟義方褰帷汝潁之地聲績可
紀建旗巴蜀之境民俗以康是用率由令典錫茲寵命
傳爾子孫長為唐輔朕聞為臣子者踐行繼於忠孝處
富貴者貽戚在於驕奢故能播美當時垂芳後裔往欽
哉爾其鑒於經籍詢於著龜見善如不及見惡如探湯
無違禮以害身無縱欲以敗俗夙夜匪懈罔有後羞可不
慎歟

冊雍州牧左武侯大將軍越王泰改封魏王文

維貞觀某年月某日甲子皇帝若曰於戲在昔哲后受
命召臨並建茂親以為藩衛然古之列國今之按部循
名或異立政則同皆所以共治黎元俱獎王室克隆鼎
祚咸必由之惟爾雍州牧左武侯大將軍越王泰生而
韶敏幼而好學樂善不倦才藝日新地則維城禮優分器
惟彼三魏寔號五都非親勿居夾輔攸屬是用命爾為
使持節都督相衛黎魏洛邢貝七州諸軍事相州刺史
改封魏王傳之子孫長為藩翰古人有言皇天無私惟

德是輔民心無常惟惠之懷往欽哉爾其鑒茲無自驕奢無邁邪佞兢兢業業以保爾茅土可不慎歟

冊洺州刺史郅王惲改封蔣王文

於戲朕光膺寶圖欽若前典崇穆親之義固維城之業並錫之以土地授之以刺史爰誓山河永作藩翰惟爾洺州刺史郅王惲幼稱岐嶷蚤聞詩禮式開土宇允備車服惟彼漢湘地兼舊楚作鎮之重僉議攸歸是命爾為使持節襄州諸軍事襄州刺史改封蔣王傳之子孫

長為唐輔朕聞立身之基曰忠與孝為政之本曰禮與德行之則成名違之則喪道詳求大訓莫此為先往欽哉爾其祇承詔命敦悅典經無奢侈以乖節儉無逸豫以虧謹肅聿修厥德垂徽永世可不慎歟

冊岐州刺史許王元祥改封江王文

於戲蓋王者受命聖人作則垂法度以經邦選賢戚以布政作屏王室莫先於胙土共治天下寔寄於班條惟爾岐州刺史許王元祥幼稟義方早有志尚地惟邢晉

禮優河裴姑蘓興壤舊吳是宅既作建牧必俟懿親是
用命爾使持節蘓州諸軍事蘓州刺史改封江王傳之
子孫世為唐輔朕聞孝敬忠貞人之美行也禮讓仁恕
政之善經也是以奉上者戒於邪僻御下者儆於驕傲
然後能保其疆土和其民人往欽哉爾其鑒持身之規
求為邦之道尊五美而屏四惡近君子而遠小人祇畏
兢兢無替乃訓可不慎歟

冊揚州都督沛王文

維龍朔元年歲次辛酉十月癸亥朔十七日巳卯皇帝
若曰於戲夫剪商統歷建侯以崇藩衛纂堯開運分土
以光震聞故廼族茂麟趾經國之令圖地利犬牙裁化
之明準惟爾雍州牧幽州都督上柱國潞王賢穎擢玄
樞軸榮紫極姿儀暎徹占對淹凝機悟韶敏風徽簡令
雕鎔信義振英挺於鵬年苑囿文辭標秀發於髫日藝
優楚沛道駕天人繇蟻層臺舞鶴懸鏡湛清襟於篁沼
鼓芳譽於蘋風是用命爾為沛王使持節都督揚和滁

潤常宣歙等七州諸軍事揚州刺史左武侯大將軍牧
及勲官並如故而徐方輿壤泗水名區榮耀虞珪賞延
漢礪加以作牧淮海式道京畿申大雅而釐風資樂善
而揚德必宜靖恭廼位克懋聲猷光被寵重可不祇歟

冊殷王旭輪文

上官儀

維龍朔二年歲次壬辰十二月丙戌朔六日辛卯皇帝
若曰於戲夫握鏡黃道經邦盛於建侯司契紫宸體國
昭於宗翰故廼祚延邇邇之業歷峻豐社之基惟爾第

四子旭輪疏景星躔導源天漢繼重離而接耀承少海
而分瀾秀質瑤華芳聲金潤天人之望夙彰髫綺大雅
之規遽形襁褓幼智該於玄表潛識冠於黃中舟象垂
風方慚性與封蟻宣譽終謝生知是用命爾為殷王上
柱國往欽哉將用齊衡兩獻比迹二南彫藻瑤璋粉澤
仁義竹池逾浚棣屏增華受茲茅土可不祗歟

冊冀王輪文

維總章二年歲次乙巳十一月景午朔二十二日丁卯

皇帝使銀青光祿大夫守司戎太常伯上騎都府崔餘
慶副使中御大監上柱國靈丘縣開國男万俟肅持節
冊命曰於戲夫天垂景宿上躔帝子之宮地載兼山下
列乾男之域是以聖人之登必則大哲王之立遂開階
莫不啓磐石於周親樹良翰於宗懿故黃神命社降若水
以疏封蒼精建侯奄中都而錫壤用能克久寶祚式固
鴻基茂緒藹乎龍圖盛業光於麟趾惟爾冀州大都督
右金吾衛大將軍上柱國豫王輪層漢毓靈上枝摘景

瑤光甫薦允標隆燕之祥玉牒初聞遽叶占熊之兆中
和在巳仁義為資洽藝通玄驗責駒之人調潛幾應物
見巨象之浮舟識茂髫辰神清綺歲趨庭承訓孝敬極
於觀喬金殿傳經敏學踰於括羽擅三雍之雅對韞七
步之閔才足以道架河書聲芬鄴頌暨龍荒北鎮鴈水
東臨海食之渠稟稜威而革暴鳴弦之俗感惠化以遷
訛製杼垂風舍唐流詠若乃西河之地寔曰興區就日
分郊蒞唐虞之舊國均霜闢野總虞夏之餘盟式圖爾居

形勝斯在是用命爾為冀王其餘官勲如故往欽哉爾其勞謙勉志樂善居心膺丹黻之徽章崇綠車之寵秩受茲中壤用保大藩允迪前修無或僭度維城之寄可不慎歟

冊汴王邕文

蘇頌

維景龍四年歲次庚戌五月辛亥朔二十八日戊寅應天神龍皇帝若曰易不云乎義崇於利建書不云乎道尚乎敦睦故知樹藩屏者以奉先王之言強宗室者乃

歸諸父之肩咨爾光祿大夫行秘書監檢校殿中監知
隴右三使仗內諸閑廐上柱國嗣號王邕爾門膺魯拜
地冠虞封本以忠孝仁義之規成乎宣慈惠和之業思
窮占雨沛經不測其精詞高賦月陳詩莫踰於麗匪惟
政修中夏稱於號叔固以姻連外戚寵則吾姨遂能在
位不驕卑謙自牧造次何者寧忘服儒從容謂之最樂
為善加以望隆才位聲軼典司動則有常靜而能曉載刊
三豕廚委於殺青爰捧六龍廐填於伏阜故可以榮絕

乎四履位徼乎九就夫陳留者徒梁之邑在浚之郊井
邑遂割於鴻溝舳艫遠通於巨壑雖帝堯遺俗國中承
重厚之風而王武舊邦天下擅膏腴之地親既賢矣我
圖爾居是用命為汴王於戲爾其敏厥行祗厥典思不
怠畏不法取則前鑒罔貽後羞作我唐藩以惠於汴土
慎之哉其保朕之休命

冊魯王永文

維太和四年歲次庚戌二月景午朔十二日丁巳皇帝

若曰咨爾元子其敬聽朕命我國家累葉重光紹休昌
運奄有區宇垂二百年良以親親無私建立子弟克固
磐石作藩王家洎予踐位敢忘丕訓是用酌於舊典謀
及台臣撰茲吉日錫以青社惟爾道扶正性天假令儀
已彰岐嶷之名嘉載信厚之器持公之道且不愧於知
子舉守藩之命亦將教於事君爰擇樂郊俾王曲阜環
以沂水遂荒海邦今用命使兵部尚書平章事牛僧孺
副使左散騎常侍吳士矩持節冊爾為魯王於戲爾宜

守正閑邪去奢昭儉害於德者不作逆於耳者必聽無
昵宵人無遠端士纂東平之樂善師河間之好古日慎
一日行之為難敬爾有國無墜我休命

冊魏王侑文

維咸通三年皇帝若曰夫剪珪分器事著周經裂地疏
封道光漢冊莫不克隆磐石作固本枝並建親賢以崇
藩翰朝有定制朕安得私爰稽盛時俾榮錫社咨爾長
男侑通暉日月稟慶霄漢蔭若木之凝華派璿源之積

潤天姿岐嶷神質聰明早彰樂善之規夙有辨牘之智
卓爾器度藹然徽猷宜荷寵章以開土宇今遣使門下
侍郎兼吏部尚書平章事杜悰副使左散騎常侍趙格
等持節冊爾為魏王於戲河外名都漳滏輿宅爾其竭
奉上之孝敬慎臨下之儀刑守道宜鑒於遠名尊賢無
忘於置醴用新魯衛之政以紹閭平之德服我休命可
不慎歟

冊涼王佺文

皇帝若曰夫維城作扞實隆定鼎之業犬牙列國以盛
建瓴之功故廣樹戚藩畢王子弟歷朝茂典列聖宏規
舉而行之朕不敢廢咨爾第二男健分暉紫極挺質丹
宮器度沉詳姿容端粹藹有成人之量形乎佩鞶之年
志玩楚詩情通沛易不勞師傅之訓動形忠孝之規爰
嘉令猷猷俾建侯社今遣使門下侍郎兼吏部尚書平章
事杜棕副使左散騎常侍趙格等持節榮絕乎四履位
微乎九就冊爾為涼王爾其奄長洪河大啟西土紹於

前烈扶我舊疆敬慎於朱邸之間謹睦於玳筵之上靖
恭其位克廣其心無縱非彝服我休命

冊蜀王佖文

皇帝若曰夫堯序九族周列五等事高維翰道在睦親
況居帝子之尊宜荷封王之典用彰慶美以固鴻基咨
爾第三男佖符彩昭融姿容朗悟騰英日域漸秀星樞
已多秤象之能纔是勝衣之歲靜不好弄言必成文魯
無紈綺之心每服詩禮之訓嘉其幼智錫以大封今遣

使門下侍郎兼吏部尚書平章事杜悰副使左散騎常
侍趙格等持節冊爾為蜀王爾其宅於坤維建茲赤社
疏以江漢鎮以岷嶓列為侯王邇我宮禁謹恭而接下秉
忠孝以律身服是寵光終於戒慎

冊景王祕文

維年月日皇帝若曰周官八統其一親親制皇子為王
得使立社於國固本之大哲后皆然咨爾第八男祕當
保抱之間有敏惠之性亦既總角遂能勝衣默識天經潛

資日就未嘗玩物可以疏封乃告守龜具聞叶吉來受
茲典永為東藩今遣某官某乙持節冊爾為景王見不
賢而能思賢爾則必賢矣知可逸而能無逸爾則常逸
矣是宜廣洪緒永丕休敬而聽之罔失厥度

冊輝王祚文

維年月日皇帝若曰古君子篤於其親者使天下興於
仁也故二王五子之封非獨立愛而已咨爾第九男祚
克岐之質見善欲遷稟訓道而必開故戲言而不愛一

隅已達四衛可陳乃申胙土之章俾奉成人之祀今遣
某官某乙持節冊爾為輝王於戲為臣為子偕在爾躬
有器有名敢私國典錫類則非孝不可遠恥則非恭不
能無替聿脩以光利建白茅金璽昭物具焉爾其夙夜
循思用稱休命

冊祁王祺文

維年月日皇帝若曰廟立之重天序可承將茂本枝式
遵懸法爰就至公之體諒非各子之心咨爾第十男祺

賦性惟和挺材亦秀飭躬罔念於紕素樂善欲忘於鐘
鼓析壤之休自天而啟臨軒之命秉禮則安今遣某官
某乙持節冊爾為祁王於戲保在深宮鮮知正範任之
作傳我必擇人苟有如韋至之諷諭安國之輔導者爾
當俯聽其言勤行其教使我公家之訓克彰於萬年而
固爾建社之寵不其大哉

冊雅王禎文

維年月日皇帝若曰周家之嗣分茅土者十五國漢景

之代書簡冊者十三王朕以寡昧之資奉神靈之統每
顧諸子寔惟天休期訓導之將成諒封建而可享咨爾
第十一男禎方當稚齒復在深宮有知憂知懼之心見
學禮學詩之性自然而稟最樂不渝遂詔有司往申舊
典今遣某官某乙持節冊爾為雅王於戲受冊之命重
屬汝躬列聖在天百辟在位在天必聽在位必觀罔怠
交修用承多祜

冊瓊王祥文

維年月日皇帝若曰不廢懿親大封同姓吾嘗觀於經籍矣然而歷代賢君正名用典必擇才行使之光昭其可以子弟之私恩冒先王之成憲朕雖不德必有不為咨爾第十二男祥於兒戲之間多幼敏之智謂之材也不曰近乎處昆弟之間有推讓之性言其行也不曰類乎是宜疏封且命申誥今遣某官某乙持節冊爾為瓊王噫作德日休爾則逸作偽日拙爾則勞擇利而行令名斯至

唐大詔令集卷三十四

欽定四庫全書

唐大詔令集卷三十五

宋 宋敏求 編

諸王

除親王官上

秦王大尉陝東行臺制

秦王兼涼州總管制

秦王益州道行臺制

秦王天策上將制

秦王領左右十二衛大將軍制

秦王兼中書令制

齊王元吉司徒制

荆王元景等子孫世襲刺史制

鄮王元裕等除官制

安州都督吳王恪等除官制

相州都督魏王泰雍州牧制

鄧王元裕等刺史制

相王并州牧制

相王雍州牧制

相王太子左衛率制

宋王成器太子太師制

宋王成器太尉等制

岐王範華州刺史等制

邠王守禮等兼襄州刺史等制

郟王嗣直安北大都護等制

岐王範太子少師等制

邠王守禮等兼晉州刺史制

除親王官

秦王大尉陝東行臺制

論道經邦任惟勲德分陝作伯實寄親賢尚書令雍州
牧右武侯大將軍上柱國秦王某器宇冲深智謀英果
義師云舉首贊奇謀親率熊羆塞旗斬將廓清函夏忠

效克彰狡寇逋誅虔劉四上總戎薄伐戡剪無遺策尚
雄遠謀猷沉密宜在鼎司肅清槐路今區宇方緝輦洛
猶蕪鎮俗治戎允資望實可大尉使持節陝東行臺其
蒲州河北諸道總管及東討諸府兵並授節度餘官悉
如故

武德元年
十二月

秦王兼涼州總管制

京室殷阜鈎陳嚴秘肅遏警巡職務尤重然而玉門遐
阻控禦八荒金城衝要尉侯攸屬宣風作牧親賢是寄

太尉尚書令雍州牧陝東道行臺左武侯大將軍上柱國秦王某地實藩枝任惟心膺職參三事功著二南識度優閑性理匡濟元戎敷化聲績備舉宜攝九門總司八校撫蒞河右允兼望實可左武侯大將軍使持節涼甘瓜鄯肅會蘭河廓九州諸軍事涼州總管其太尉中書令雍州牧陝東道行臺右武侯大將軍上柱國王如

故武德二年五月

冊秦王益州道行臺制

蜀郡沃野田惟井絡控馭邛笮臨制已渝求瘼宣風朝
寄尤重總司岳牧是屬懿親太尉尚書令陝東道行臺
雍州牧左武侯大將軍使持節涼州總管上柱國秦王
某器宇冲深體識明允專征閭外茂績克宣敷政京畿
嘉聲已著鎮撫岷漢僉論攸宜可益州道行臺尚書令
武德三
年四月

秦王天策上將制

德懋懋官功懋懋賞經邦盛則哲王彞訓是以華袞寵

章允洽希世之勲玉戚朱千寶表宗臣之貴太尉尚書
令雍州牧左武侯大將軍陝州道行臺尚書令涼州總
管上柱國秦王景締構之始元功夙著職兼内外文教
聿宣薛舉盜寇秦隴武周擾亂河汾受朕專征屢決妖
醜然而世充僭擅伊洛未清建德憑陵趙衛猶梗總戎
致討問罪三川馭以長筭允黨窘蹙既而漳濱蟻聚來
渡河津同惡相求志圖抗拒三軍爰整一舉克定戎威
遠暢九圍靜謐鴻勲盛績朝野具瞻申錫寵章實允僉

議宜崇徽命位高羣品文物所加特超恒數建官命職
因事紀功肇錫嘉名用標茂實可授天策上將位在王
公上領司徒陝東道大行臺尚書令增邑一萬戶通前
三萬戶餘官並如故加賜金輅一袞冕之服玉璧一雙
黃金六千斤前後鼓吹九部之樂班劍四十人
武德四年九月
秦王領左右十二衛大將軍制

禦侮折衝朝寄尤切任惟勲德實佇親賢天策上將太
尉領司徒尚書令陝東道大行臺益州道行臺尚書令

雍州牧涼州總管左右武侯大將軍上柱國秦王某字
量凝邈志識明卽爰始締構功叅昺業廓清秦隴茂績
以彰戡定周韓成威遐暢河朔餘寇取若拾遺濟代逋
誅克同振朽宣風都輦綜務朝端政術有聞綱目斯舉
宜加褒寵式兼常秩總攝戎機望寔惟允可領左右十

二衛大將軍餘並如故

武德五年十月

秦王等兼中書令制

絲綸樞秘寄任惟宸納獻職惟顯要望實兼隆親賢斯

屬天策上將太尉兼司徒尚書令陝東道大行臺尚書
令雍州牧十二衛大將軍秦王某字量冲深風神爽悟
任兼文武聲績著聞司徒并州大將軍稷州刺史左領
軍大都督右武侯大將軍上柱國齊王元吉器懷淹密
業紹英茂內外政務克舉加珥蟬餌朝典攸宜某可中
書令元吉可侍中餘如故

武德八年十一月

齊王元吉司徒制

三台望重仰協辰曜五教任隆俯安邦國實資懿德式

寄親賢侍中并州大都督左衛大將軍上柱國齊王元
吉字量凝邈風神爽邁徽猷夙著嘉譽早隆出蒞方岳
政績兼懋入侍帷宸獻替斯允推轂閭外備展勲庸職
司禁旅戎章已緝燮理之任朝典尤宜可司徒餘如故

武德九
年二月

荊王元景等子孫世襲刺史制

門下皇帝受命步驟之迹已殊經籍所紀質文之道匪
一雖治亂不同損益或異至於設官司以制海內建藩

屏以輔王室莫不明其典章義存於致治崇其賢戚志在於無疆者也朕以寡昧丕承洪緒寅畏三靈憂勤萬姓考往哲之餘論求經邦之長策帝業之重獨任難以成務天下之廣因人易以獲安然則侯伯肇於自昔州郡始於中代聖賢異術沿革隨時復古則義難頓從循今則事不盡中遂規模周漢斟酌曹馬採按部之嘉名參建侯之舊制共治之職重矣分土之實存焉已有詔書陳至理繼世垂範貽厥後昆維城作固同符前烈荆

州刺史荆王元景等或地居旦奭夙聞詩禮或望及間
平早稱才藝並爵隆土宇寵兼車服誠孝之心無忘於
造次風政之譽克著於期月宜冠常典昨以休命其所
任刺史咸令子孫世世承襲有司仍准前詔詳為條制
奏聞俾克本枝之盛隨天地而長久刺舉之榮鞏山河
而無絕

貞觀十一年六月

授鄆王元裕等官制

門下膏腴之地允屬茂親藩屏之重寄深磐石鄆王元

裕譙王元名並器懷韶令業尚明敏望兼梁趙譽冠鄴
郇並建之議可歸按部之職斯重加茲寵命仰惟國章
元裕可使持節鄧州諸軍事鄧州刺史改封鄧王元名
可持節壽州刺史改封舒王食邑並如故

貞觀十一年正月

授安州都督吳王恪等官制

門下體國經邦資懿親而作屏設官分職俟方岳以宣
風用能式固本枝克隆磐石前安州都督吳王恪等並
識量明允體業貞固禮高彝器望重維城學藝之譽日

新忠孝之風早茂分命有典僉議攸歸可依前件

相州都督魏王泰雍州牧制

門下牧伯之重莫先畿甸周衛之職任切巡警詳求今古必俟賢戚相州都督魏王泰器業凝遠文藻夙成好學見稱樂善不倦入作卿士抑有前規重司文武允膺僉議可雍州牧

授鄧王元裕等刺史制

門下維翰之寄允屬茂親藩屏之重必資令望鄧州刺

史鄧王元裕襟神韶令理識清明壽州刺史舒王元名
體業夷雅志尚淹和並夙膺朝寵早蒞藩任政績著於
謠俗嘉譽洽於縉紳宜加榮命允茲朝典元裕可梁州
刺史元名可許州刺史封並如故

相王并州牧制

鸞臺神畿緝化咨牧所難天府屯兵命將為重惟賢是
辟非親勿居太子左千牛衛率安北都護相王旦黃道
承暉紫庭趨訓儀表瓌傑識量虛明資忠孝以立身仗

經書而致德勇高衛霍詞優楊史必能外振威聲內清
戎政宜膺夾輔之寄兼司羽翼之重可并州牧餘如故

長安二
年五月

相王雍州牧制

鸞臺京輔才難神畿化首四方取則萬邦承流自非明
德懿親何以宣風翊政并州牧太子左千牛衛宰相王
旦紫庭趨訓青社疏封雅度冲深瓌資秀傑忠孝天假
禮樂日宣闕

聲高卧護懷共理

之幹有兼辨之能宜紆朝綽用清都輦可雍州牧

長安二年

七月

相王太子右衛率制

驚臺宮寮之任朝選所難相王旦地在懿親躬此明德
持沛獻之法度河間之儒雅元良肇建博望初開徽章
既陳禁旅增肅宜紆金璽之重式掌銅樓之衛可依前
件

宋王成器太子太師制

門下孟侯之禮雖歸於冢，肩太伯之風實尚於高節。左衛大將軍宋王成器幼而聰敏，長而溫仁，禮樂同歸，質文相半。孝以為政，每用因親；忠以立誠，所期尊主。故能樂於為善，好在儒服。占蟻穴以探微，登雀臺而成賦。自奄有梁宋，作藩邦家。其儀孔臧，其德可大。朕之元子，當踐嗣君以隆基，有大功神祇，僉屬由是。朕前懇讓言在必行天下，至公誠不可奪。奚有立季之典，庶協從人之願。況別為九州，必資於牧伯。貞夫萬國，允佇於師傳。式

副僉諧之求仍光不拜之寵可太子太師雍州牧揚州大都督
別加實封二千戶賜物五千段紬馬二千疋奴婢十房
金銀器皿二百事甲第一區良田三十頃餘如故主者
施行

唐隆元年六月二十五日

宋王成器太尉等制

門下古有知通於道情辨於物可以調陰陽節風雨者
委之三事以康萬人齔鰥之謂也司空兼揚州大都督
上柱國宋王成器益州大都督兼右衛大將軍申王成

義單于大都護兼右金吾衛大將軍邠王守禮等並明
德茂親崇儒樂善為國翰屏當朝羽儀豈其朱弟之詩
美則緇衣之咏寧止愛均花萼禮錫苴茅而已哉必能
論道經邦佐朕為政俾允升台之望宜膺補袞之闕成
器可太尉兼揚州大都督成義可司徒兼并州大都督
守禮可司空勲如故主者施行

先天二年
八月九日

岐王範華州刺史等制

黃門周以魯衛之親夾輔王室漢以間平之親來朝京

師勞稽藍章允迪前訓太常卿兼左衛率并州大都督
岐王範荊州大都督兼秘書監薛王業等朕之同氣邦
之偉才周旋禮樂佩服儒雅爰職奉常則墜典咸秩是
司外史則羣言罔遺光我蕃猷敷於事典日同問安之
慶時歸受制之連出入重於楚元終始欽於沛獻家人撫
愛雖屬於從梁國史垂聲必期於分陝廼眷畿輔不遠
闐闐漆沮既從河華作鎮荆桐所寄磐石攸宜遂其至
公之請佇聽牧人之術範可使持節華州諸軍事兼華

州刺史大常卿勲封如故業可使持節同州諸軍事兼
同州刺史秘書監勲封如故至州日須稍優游不可煩
以細務自非大事及奏事餘並令上佐知主者施行

開元

二年十月
二十九日

邠王守禮等兼襄州刺史等制

黃門樹於藩屏莫非親屬居以彤勝必任親賢司空兼
隴州刺史邠王守禮德比閭平賢於魯衛動不忘於仁
恕言必備於忠肅人聯花萼擁駟來朝出割竹符憑熊

往鎮睦茲樊鄧是稱漢沔惟城池之枕倚乃川陸之雄
要故鳴騶戒路建隼為邦副朕陝東之美更聞峴南之
政可使持節襄州諸軍事兼襄州刺史司空勲如故至
州日須稍優游不可煩以細務自非大事及奏事餘並
令上佐知主者施行

開元三年十
二月九日

郊王嗣直安北大都護等制

黃門虞放三苗允歸於敷德周稱二陝用切於聞政頃
以驕子天亡匈奴運盡願為臣妾者望塞款門編我岷

黎者雲屬波委北窮大漠西被流沙撫而柔之僉曰分
命郟王嗣直陝王嗣升聰察天假英明日新忠肅恭懿
寬仁孝友探沛易之象象自詣精微讀楚詩之比興能
傳麗則故可揚威懷之旨宣鎮靜之風畀以藩翰俾清
疆場嗣直可安北大都護仍充安撫河東門內隴右諸
蕃部落大使嗣升可安西大都護仍充河西道四鎮諸
蕃部落大使右衛大將軍兼安北大都護上柱國長平
郡開國公張知運右羽林大將軍兼安西大都護四鎮

經畧大使上柱國潞國公郭虔瓘等國之老臣朝之宿
將長策子房所以運籌安邊遠圖充國所以言事必能
寬則得衆惠以養人各綏一方兼委佐貳知運可安北
大都護仍兼鄴王府長史及安撫諸蕃副大使虔瓘可
安西副大都護仍兼陝王府長史安撫諸蕃副大使餘
如故主者施行

開元四年正月二十一日

岐王範太子太師等制

黃門贊翼皇儲允歸師保崇敬叔父諒屬親賢號州刺

史岐王範秘書監兼幽州刺史薛王業等明允篤誠溫
良恭儉忠孝光於令典儒雅偉於成業自為我藩翰擁
其干旌雅門卽伯之詩尤美魯公之政雖頌條是務而
道理兼資因入拜於承明佇來儀於博望範可太子太
師兼虢州刺史業可太子少保兼幽州刺史勲封等各
如故主者施行

開元四年
六月七日


邠王守禮等兼晉州刺史制

禮著睦親書稱分命鎮彼黎獻莫如兄弟司空兼滑州

刺史上柱國邠王守禮開府儀同三司兼潭州刺史上
柱國宋王憲司徒兼虢州刺史上柱國申王撝太子少
師兼鄭州刺史上柱國岐王範太子少保兼衛州刺史
薛王業等朕之花萼人之珪璋文儒在躬孝友成性入
踐朝列望優植武出綜藩條聲均魯衛鳧在涇水鷺鳴
岐山新田擬於晉汾舊陝鄰於虢國眷茲翰屏密邇京
都宜扇百城之風佇延九野之潤守禮可使持節晉州
諸軍事兼晉州刺史範可持節涇州諸軍事兼涇州刺史

撫可使持節絳州諸軍兼絳州刺史範可使持節岐州
諸軍兼岐州刺史業可使持節虢州諸軍事兼虢州刺
史餘各如故務非灼然要重者各令上佐知

開元元年十二月



唐大詔令集卷三十五